

PROXECTO FARO

MODELO DE CENTRO

Marco de referencia para a autorregulación e a inclusión educativa

CEIPP VISTA ALEGRE - BURELA

CURSO 2026/2027

COLECCIÓN FARO

ÍNDICE:

1. Presentación.
2. Identidade do Proxecto FARO.
3. Modelo de apoio do Proxecto FARO.
4. Obxectivos do Proxecto FARO.
5. Organización do Proxecto FARO.
6. Funcionamento do Proxecto FARO.
7. Avaliación e mellora continua.
8. Evidencias que sustentan o Proxecto FARO.
9. Fundamentación normativa.
10. Bibliografía e referencias normativas.

1. Presentación.

A escola actual afronta o reto de ofrecer unha resposta educativa de calidade a un alumnado cada vez máis diverso, no que conviven diferentes ritmos de aprendizaxe, formas de comunicación, necesidades sensoriais, emocionais e condutuais. Esta realidade constitúe unha oportunidade para avanzar cara a unha educación máis inclusiva, capaz de adaptar as contornas de aprendizaxe ás necesidades das persoas e non ao contrario.

O CEIPP Vista Alegre asume este compromiso a través do Proxecto FARO, un modelo de centro orientado a promover a autorregulación, o benestar emocional e a participación de todo o alumnado na vida escolar.

O Proxecto FARO nace da convicción de que o benestar emocional é unha condición indispensable para a aprendizaxe. Cando un alumno ou alumna se sente seguro, comprendido e acompañado, aumenta a súa capacidade para participar, relacionarse, afrontar os retos cotiáns e desenvolver progresivamente a súa autonomía. Pola contra, as situacións de sobrecarga emocional, sensorial ou condutual poden converterse en barreiras que dificultan a aprendizaxe e a convivencia se o centro non dispón de medidas organizativas axeitadas para previlas e atendelas.

Este proxecto propón unha resposta educativa de carácter preventivo, baseada na creación de contornas seguras, previsibles e accesibles, na ensinanza explícita da autorregulación e na coordinación de todo o profesorado. O seu obxectivo non é crear un recurso destinado unicamente ao alumnado con necesidades específicas de apoio educativo, senón incorporar unha cultura compartida na que a regulación emocional e o benestar formen parte da práctica educativa diaria.

O Proxecto FARO concíbese como un modelo organizativo que integra actuacións universais para todo o alumnado e intensifica os apoios cando as necesidades así o requiren. Neste marco inclúense a creación dos Espazos FARO, a elaboración de Plans Individuais de Autorregulación (PIAR), a formación do profesorado, a coordinación coas familias e o desenvolvemento de protocolos comúns de actuación.

O nome do proxecto responde á imaxe do faro como símbolo de orientación, seguridade e acompañamento. Do mesmo xeito que un faro non percorre o camiño polos barcos, pero permanece sempre como unha referencia estable que facilita a navegación, o noso centro educativo aspira a ofrecer ao alumnado os apoios necesarios para que cada neno e cada nena desenvolva progresivamente a súa capacidade para comprenderse, regularse e participar activamente na vida escolar.

O Proxecto FARO non pretende incorporar unha nova tarefa á actividade docente, senón organizar, dar coherencia e fortalecer moitas das prácticas inclusivas que xa forman parte da realidade do centro. Constitúe, en definitiva, un compromiso colectivo coa construción dunha escola máis accesible, máis respectuosa coa diversidade e máis sensible ás necesidades de todo o alumnado, convencida de que educar tamén significa ensinar a sentirse seguro para poder aprender.

2. Identidade do Proxecto FARO.

O Proxecto FARO é o modelo de centro do CEIPP Vista Alegre para promover a autorregulación, o benestar emocional e a inclusión educativa de todo o alumnado.

Parte da convicción de que cada alumno e cada alumna pode necesitar, en diferentes momentos da súa escolaridade, apoios para regular as súas emocións, condutas ou respostas sensoriais. Estes apoios forman parte da resposta educativa ordinaria do centro e teñen como finalidade favorecer a participación, a aprendizaxe e o benestar.

O Proxecto FARO entende a autorregulación como unha competencia que se aprende e se desenvolve mediante o acompañamento, a práctica e a creación de contornos seguros, previsibles e accesibles. Por este motivo, a intervención non se centra exclusivamente na resposta ante situacións de desregulación, senón tamén na prevención, na anticipación e no ensino de estratexias que permitan ao alumnado adquirir unha maior autonomía.

Así mesmo, o proxecto asume unha visión inclusiva da educación, na que as dificultades de participación non se explican unicamente polas características individuais do alumnado, senón tamén polas barreiras que poden existir no contexto escolar. En consecuencia, o centro comprométese a identificar e tentar reducir estas barreiras mediante medidas organizativas, metodolóxicas e relacionais que favorezan a participación de todo o alumnado.

Desde esta perspectiva, o Proxecto FARO non constitúe un recurso destinado a un grupo concreto de alumnos e alumnas nin un espazo reservado para determinadas necesidades educativas. É un modelo de organización do centro que orienta a actuación de todo o profesorado e integra os apoios necesarios para responder á diversidade presente nas aulas.

O éxito do proxecto baséase na responsabilidade compartida de toda a comunidade educativa. O profesorado, o Departamento de Orientación, o persoal non docente e as familias contribúen, desde as súas funcións, á creación dunha cultura escolar baseada no respecto, na prevención, na colaboración e no acompañamento.

O CEIPP Vista Alegre entende que unha escola inclusiva é aquela que ofrece os apoios necesarios antes de que aparezan as dificultades, que acompaña ao alumnado nos momentos de maior vulnerabilidade e que promove oportunidades reais de participación para todas as persoas.

O Proxecto FARO nace coa vontade de converter estes principios nunha práctica educativa compartida, estable e sostible, integrada no funcionamento ordinario do centro e orientada á mellora continua.

3. Modelo de apoio do Proxecto FARO.

O Proxecto FARO organízase como un modelo de apoios educativos dirixido a favorecer a autorregulación, o benestar emocional e a participación de todo o alumnado.

Parte da consideración de que todas as persoas poden necesitar apoio para regularse nalgún momento da súa escolaridade, aínda que non todas o precisarán coa mesma frecuencia nin coa mesma intensidade. Por este motivo, o proxecto artículase mediante un sistema flexible de apoios que se adapta ás necesidades cambiantes de cada alumno ou alumna.

Este modelo estrutúrase en tres niveis de intervención.

3.1. Apoios universais.

Constitúen a base do Proxecto FARO e están dirixidos á totalidade do alumnado.

Inclúen todas aquelas actuacións preventivas que forman parte da práctica educativa diaria e que contribúen a crear contornas seguras, previsibles e accesibles.

Entre outras medidas, destacan:

- o establecemento de rutinas claras e anticipación das actividades;
- a utilización de apoios visuais cando resulten necesarios;
- a ensinanza explícita de estratexias de autorregulación;
- os descansos activos e as pausas reguladoras;
- a educación emocional integrada na acción tutorial;
- a creación de ambientes de aula que favorezan o benestar e a participación.

Estas actuacións non requiren valoración específica nin medidas individualizadas, xa que forman parte da resposta educativa ordinaria do centro.

3.2. Apoios específicos.

Algúns alumnos e alumnas poden precisar, de maneira temporal ou continuada, medidas adicionais que faciliten a súa regulación emocional, sensorial, comunicativa ou condutual.

Nestes casos, o Proxecto FARO incorpora actuacións específicas como:

- acceso planificado aos Espazos FARO;
- designación dun Mestre FARO como persoa de referencia;
- elaboración dun Plan Individual de Autorregulación (PIAR), cando se considere necesario;
- coordinación periódica coa familia;
- seguimento das medidas adoptadas.

Estas actuacións teñen carácter flexible e revisaranse periodicamente en función da evolución das necesidades do alumnado.

3.3. Apoios intensivos.

Algúns alumnos e alumnas pode requirir unha intervención máis intensiva debido á frecuencia, intensidade ou complexidade das súas necesidades de regulación.

Nestes casos, o centro establecerá medidas individualizadas que poderán incluír:

- protocolos específicos de prevención e intervención;
- adaptación das actividades complementarias e extraescolares;
- coordinación cos servizos de orientación e, cando proceda, con outros servizos externos;
- planificación detallada das actuacións dos diferentes profesionais implicados.

Estas medidas terán sempre como finalidade favorecer a participación do alumnado na vida escolar nas condicións de maior autonomía e benestar posibles.

Un modelo dinámico.

Os niveis de apoio non constitúen categorías fixas nin dependen exclusivamente da existencia dun diagnóstico.

O alumnado poderá acceder a diferentes niveis de apoio en función das súas necesidades en cada momento da súa escolaridade.

O obxectivo do Proxecto FARO é ofrecer a intensidade de apoio necesaria en cada situación, promovendo sempre a autonomía progresiva e a participación activa de todo o alumnado.

4. Obxectivos do Proxecto FARO.

O Proxecto FARO ten como finalidade incorporar ao modelo organizativo do centro unha resposta educativa común que promova a autorregulación, o benestar emocional e a participación de todo o alumnado, favorecendo contornos de aprendizaxe máis inclusivos, accesibles e seguros.

Para acadar esta finalidade, o proxecto estrutúrase arredor das seguintes liñas estratéxicas:

Liña estratéxica	Obxectivo
1. Promoción da autorregulación	Desenvolver no alumnado competencias para identificar as propias necesidades de regulación e utilizar estratexias axeitadas de maneira progresivamente autónoma.
2. Organización de contornos inclusivos	Incorporar medidas preventivas e apoios universais que favorezan a participación, o benestar e a aprendizaxe de todo o alumnado.
3. Coordinación da resposta educativa	Establecer criterios comúns de actuación entre os distintos profesionais do centro para garantir unha intervención coherente e continuada.
4. Colaboración coas familias	Favorecer a comunicación e a participación das familias no desenvolvemento das medidas de autorregulación que afecten aos seus fillos e fillas.
5. Mellora continua do proxecto	Avaliar periodicamente o funcionamento do Proxecto FARO para introducir as melloras organizativas e metodolóxicas que resulten necesarias.

Estas liñas estratéxicas concretaranse nas actuacións, protocolos e instrumentos de avaliación recollidos nos capítulos seguintes deste documento.

5. Organización do Proxecto FARO.

O Proxecto FARO intégrase na organización ordinaria do centro e desenvólvese mediante a coordinación dos diferentes profesionais implicados na atención educativa do alumnado. Non constitúe unha estrutura independente, senón un modelo de traballo compartido que organiza e dá coherencia ás actuacións relacionadas coa autorregulación, o benestar emocional e a inclusión.

5.1. Equipo FARO.

O Proxecto FARO contará cun **Equipo FARO**, responsable da coordinación, seguimento e avaliación do programa.

Este equipo estará integrado, con carácter xeral, polas compoñentes do Departamento de Orientación, xunto coa dirección do centro.

Poderán incorporarse ás reunións outros profesionais cando a situación dun alumno ou alumna ou a organización do centro así o aconsellen.

O Equipo FARO reunirase periodicamente coincidindo, sempre que sexa posible, cos espazos de coordinación do DO xa establecidos no centro.

5.2. Funcións do Equipo FARO.

Corresponde ao Equipo FARO:

- coordinar a implantación e desenvolvemento do proxecto;
- establecer criterios comúns de actuación;
- asesorar ao profesorado na aplicación das medidas de autorregulación;
- realizar o seguimento dos Plans Individuais de Autorregulación (PIAR), cando existan;
- analizar as incidencias relevantes e propoñer medidas de mellora;
- elaborar a memoria anual do Proxecto FARO.

5.3. Funcións dos diferentes profesionais.

Profesional	Funcións principais
Dirección	Impulsar o proxecto, facilitar os recursos organizativos necesarios e promover a coordinación entre os distintos profesionais.
Departamento de Orientación	Asesorar na planificación das medidas, colaborar na elaboración dos PIAR, apoiar a avaliación do proxecto e coordinar a relación con outros servizos cando sexa necesario.
Profesorado titor e especialista	Aplicar as medidas de apoio universal, identificar necesidades de regulación, utilizar os procedementos establecidos polo proxecto e colaborar co resto do equipo educativo.
Profesorado PT e AL	Asesorar na adaptación das medidas de regulación ás características do alumnado, colaborar na elaboración de materiais e participar no seguimento das intervencións cando proceda.
Persoa adulta de referencia (Mestre FARO)	Acompañar, cando sexa necesario, ao alumnado que precise unha figura estable de referencia para favorecer os procesos de regulación e reincorporación á actividade escolar.

5.4. O mestre FARO.

Algúns alumnos e alumnas poderán contar cunha persoa adulta de referencia, denominada **Mestre FARO**, cando as súas necesidades de regulación así o aconsellen.

Esta función poderá ser asumida polo titor ou titora, por un mestre ou mestra especialista, por profesorado de apoio ou por outro docente que manteña un vencello educativo significativo co alumno ou alumna.

A designación desta figura responderá ás necesidades do alumnado e ás posibilidades organizativas do centro, revisándose periodicamente dentro do Equipo FARO.

5.5. Os Espazos FARO.

O centro contará con **tres Espazos FARO**, un en cada edificio e outro no pavillón, adaptados ás características dos espazos dispoñibles e ás necesidades do alumnado.

Os Espazos FARO constitúen recursos educativos destinados a favorecer os procesos de autorregulación e non terán, en ningún caso, carácter disciplinario nin sancionador.

A súa organización, funcionamento e criterios de utilización desenvolveranse no protocolo específico do Proxecto FARO.

5.6. Colaboración coas familias.

As familias constitúen un elemento esencial no desenvolvemento do Proxecto FARO.

O centro promoverá canles de comunicación e colaboración que permitan compartir información relevante, favorecer a coherencia entre os diferentes contextos educativos e incorporar, sempre que sexa posible, as achegas das familias na planificación das medidas de apoio ao alumnado.

6. Funcionamento do Proxecto FARO.

O Proxecto FARO establece un procedemento común de actuación para favorecer unha resposta educativa coherente ante as necesidades de autorregulación do alumnado.

A intervención desenvolverase sempre desde un enfoque preventivo, flexible e proporcional ás necesidades observadas, priorizando a permanencia do alumnado nos seus contextos ordinarios de aprendizaxe sempre que sexa posible.

6.1. Detección das necesidades de regulación.

Calquera docente poderá identificar indicadores que suxiran a necesidade de ofrecer medidas de apoio á autorregulación.

Entre outros, poderán observarse:

- signos de sobrecarga emocional ou sensorial;
- dificultade para manter a atención ou a participación;
- incremento da ansiedade, frustración ou axitación;
- cambios significativos na comunicación ou na conduta.

A detección destas situacións non implica necesariamente a existencia dunha dificultade grave, senón a oportunidade de ofrecer os apoios máis axeitados en cada momento.

6.2. Aplicación das medidas ordinarias.

Como criterio xeral, a primeira resposta desenvolverase no propio contexto educativo da aula mediante as medidas universais previstas no Proxecto FARO.

Entre outras actuacións, poderán empregarse:

- anticipación e reorganización da tarefa;
- pausas reguladoras;
- utilización de apoios visuais;
- adaptación temporal das demandas;
- acompañamento verbal e emocional.

Sempre que estas medidas resulten suficientes, o alumnado continuará participando na actividade ordinaria.

6.3. Activación dos apoios específicos.

Cando as medidas ordinarias non resulten suficientes ou as características do alumno ou alumna así o aconsellen, poderá activarse algunha das medidas específicas previstas no Proxecto FARO.

Estas actuacións poderán incluír:

- utilización do Espazo FARO;

- acompañamento pola persoa adulta de referencia (Mestre FARO), cando exista;
- aplicación das medidas recollidas no PIAR, se o alumno ou alumna dispón deste documento.

A activación destas medidas responderá sempre a criterios educativos e preventivos, nunca disciplinarios.

6.4. Reincorporación á actividade.

Finalizado o proceso de regulación, favorecerase a reincorporación do alumno ou alumna á actividade escolar nas condicións que permitan a súa participación con éxito.

Sempre que sexa posible, esta reincorporación realizarase de maneira natural, evitando situacións que poidan xerar estigmatización ou exposición innecesaria.

6.5. Seguimento e revisión.

Cando unha situación de desregulación se repita con frecuencia ou requira medidas específicas de maneira continuada, o equipo educativo valorará a conveniencia de revisar os apoios establecidos, elaborar ou actualizar un PIAR e reforzar a coordinación entre os profesionais implicados e a familia.

O seguimento das actuacións permitirá adaptar progresivamente a intensidade dos apoios ás necesidades reais do alumnado, promovendo sempre a súa autonomía e participación.

7. Avaliación e mellora continua.

A avaliación do Proxecto FARO ten como finalidade comprobar o seu grao de implantación, valorar o impacto das actuacións desenvolvidas e orientar a toma de decisións para a súa mellora continua.

Enténdese como un proceso participativo e continuo, dirixido non só a verificar o cumprimento das actuacións previstas, senón tamén a analizar a súa utilidade real para favorecer a autorregulación, o benestar e a participación do alumnado.

7.1. Que se avalía?

A avaliación centrarase, entre outros, nos seguintes aspectos:

Ámbito	Evidencias de avaliación
Organización	Funcionamento do Equipo FARO, coordinación entre profesionais, adecuación dos Espazos FARO e dispoñibilidade de recursos.
Intervención educativa	Aplicación das medidas universais e específicas, utilización dos PIAR cando proceda e coherencia nas actuacións do profesorado.
Impacto no alumnado	Participación nas actividades, evolución das necesidades de regulación, benestar percibido e acceso efectivo aos apoios.
Colaboración coas familias	Comunicación estable, participación nas medidas acordadas e valoración do funcionamento do proxecto.

7.2. Como se avalía?

Para a avaliación do proxecto poderán empregarse diferentes fontes de información, entre elas:

- rexistros de utilización do Proxecto FARO;
- reunións de coordinación do Equipo FARO;
- achegas do profesorado;

- opinión das familias;
- análise das incidencias e das medidas adoptadas;
- memoria anual do proxecto.

7.3. Para que se avalía?

A información obtida permitirá:

- identificar fortalezas e necesidades de mellora;
- revisar a organización e os procedementos de actuación;
- actualizar os recursos e materiais empregados;
- propoñer actuacións de formación para o profesorado;
- incorporar as modificacións necesarias á Programación Xeral Anual e aos documentos de centro.

O Proxecto FARO concíbese como un modelo dinámico, aberto á reflexión compartida e á mellora continua, adaptándose á evolución das necesidades do alumnado e da comunidade educativa.

8. Evidencias que sustentan o Proxecto FARO.

As decisións organizativas e pedagóxicas recollidas neste documento baséanse en evidencias procedentes da investigación educativa, da psicoloxía do desenvolvemento, da neurociencia e dos estudos sobre educación inclusiva. O Proxecto FARO adopta estas achegas como marco de referencia para orientar a práctica educativa do centro.

8.1. A autorregulación ensínase e acompáñase.

A evidencia científica sinala que a autorregulación constitúe unha competencia que pode desenvolverse mediante o acompañamento adulto, a práctica e a creación de contornos previsibles e seguros. As investigacións de Stuart Shanker e Daniel J. Siegel destacan a importancia de comprender os procesos de regulación emocional e de proporcionar apoios adaptados ás necesidades de cada alumno ou alumna.

Esta evidencia sustenta a incorporación do ensino explícito de estratexias de autorregulación, a existencia dos Espazos FARO e o deseño dos Plans Individuais de Autorregulación (PIAR).

8.2. A conduta é unha forma de comunicación.

As achegas de Ross W. Greene e doutros autores poñen de manifesto que moitas condutas desafiantes responden a dificultades nas habilidades para afrontar determinadas situacións e non a unha falta de vontade para cumprir as normas.

Esta perspectiva orienta o Proxecto FARO cara á prevención, á análise das causas da desregulación e á procura de apoios educativos que permitan ao alumnado participar con éxito na vida escolar.

8.3. Os contextos inclusivos favorecen a participación.

Os estudos sobre educación inclusiva evidencian que a participación do alumnado aumenta cando os centros eliminan barreiras e organizan os apoios desde unha perspectiva universal.

As contribucións de Gerardo Echeita, David Durán e Coral Elizondo, xunto cos principios do Deseño Universal para a Aprendizaxe (DUA), sustentan a organización do Proxecto FARO como unha medida de centro dirixida a todo o alumnado e non exclusivamente a quen presenta un diagnóstico determinado.

8.4. A prevención resulta máis eficaz que a intervención en crise.

A investigación coincide en sinalar que a anticipación, a adaptación dos contornos, os apoios visuais, a estruturación das actividades e a coordinación entre profesionais reducen a aparición de situacións de desregulación e favorecen a participación do alumnado.

Por este motivo, o Proxecto FARO incorpora medidas preventivas na organización diaria do centro e na planificación das actividades complementarias e extraescolares.

8.5. A colaboración mellora a resposta educativa.

A literatura científica destaca que as respostas educativas máis eficaces son aquelas que implican a coordinación entre profesorado, orientación, especialistas e familias.

En coherencia con esta evidencia, o Proxecto FARO establece procedementos de coordinación, seguimento e avaliación compartida, entendendo que a inclusión e o benestar do alumnado constitúen unha responsabilidade de toda a comunidade educativa.

As referencias bibliográficas que fundamentan estas decisións recóllense no capítulo 10 deste documento.

9. Fundamentación normativa.

O Proxecto FARO desenvólvese de acordo cos principios que orientan o sistema educativo español e galego en materia de equidade, inclusión, benestar emocional e atención á diversidade.

A súa organización responde ao marco normativo vixente e contribúe ao desenvolvemento das medidas que os centros educativos están chamados a promover para garantir unha educación de calidade para todo o alumnado.

9.1. Educación inclusiva.

O proxecto fundamenta a súa actuación no principio de educación inclusiva, entendida como o dereito de todo o alumnado a participar activamente na vida do centro, recibindo os apoios necesarios para o seu desenvolvemento persoal, social e académico.

Neste sentido, o Proxecto FARO promove medidas organizativas e educativas dirixidas a eliminar barreiras para a aprendizaxe e a participación, favorecendo a presenza, a participación e o progreso de todo o alumnado.

9.2. Atención á diversidade.

O modelo de apoios do Proxecto FARO desenvólvese conforme aos principios de prevención, flexibilización da resposta educativa, accesibilidade e personalización da aprendizaxe recollidos na normativa educativa.

As medidas universais, específicas e intensivas descritas neste documento responden ao enfoque actual de atención á diversidade, priorizando a intervención temperá e a adopción de apoios proporcionais ás necesidades do alumnado.

9.3. Benestar emocional e desenvolvemento integral.

A normativa educativa recoñece o desenvolvemento persoal, emocional e social como unha finalidade esencial da educación.

Neste marco, o Proxecto FARO incorpora actuacións dirixidas a favorecer a autorregulación, a convivencia positiva, a prevención das situacións de desregulación e a creación de contornos seguros para a aprendizaxe.

9.4. Organización do centro.

O proxecto intégrase na autonomía organizativa e pedagóxica do centro, incorporándose aos seus documentos institucionais e coordinándose coas restantes medidas de atención á diversidade, convivencia, acción tutorial e orientación educativa.

A súa implantación realizarase mediante os procedementos de coordinación ordinarios do centro, favorecendo a participación do profesorado, do Departamento de Orientación e das familias.

9.5. Referencias normativas.

O Proxecto FARO toma como referencia, entre outras disposicións de aplicación, as seguintes:

- A Constitución Española.
- A Convención das Nacións Unidas sobre os Dereitos das Persoas con Discapacidade.
- A Convención sobre os Dereitos do Neno.
- A Lei Orgánica 2/2006, do 3 de maio, de Educación, modificada pola Lei Orgánica 3/2020 (LOMLOE).
- A normativa autonómica da Comunidade Autónoma de Galicia en materia de currículo, inclusión educativa, atención á diversidade, orientación educativa e organización dos centros docentes.

A relación detallada destas referencias recóllese no capítulo seguinte.

10. Bibliografía e referencias normativas.

A presente bibliografía recolle as principais obras e disposicións que fundamentan o Proxecto FARO. A selección realizouse atendendo á súa relevancia científica, á súa aplicación práctica no ámbito educativo e á súa contribución ao desenvolvemento dunha escola inclusiva.

10.1. Autorregulación, desenvolvemento emocional e conduta.

Greene, R. W. (2019). *Perdidos en la escuela*. Editorial Médica Panamericana.

Shanker, S. (2019). *Calma, atención y aprendizaje. Estrategias para la autorregulación en el aula*. Narcea.

Siegel, D. J., & Bryson, T. P. (2012). *El cerebro del niño*. Alba Editorial.

10.2. Educación inclusiva.

Durán, D. (2017). *Aprenseñar. Evidencias e implicacións educativas da aprendizaxe entre iguais*. Graó.

Echeita, G. (2006). *Educación para la inclusión o educación sin exclusiones*. Narcea.

Elizondo Carmona, C. (2022). *Neuroeducación y diseño universal para el aprendizaje. Una propuesta práctica para el aula inclusiva*. Octaedro.

Elizondo Carmona, C. (2024). *Diseñar hasta los límites. Estrategias para abrir nuevas posibilidades, retos y desafíos para todo el alumnado*. Octaedro.

10.3. Autismo e neurodiversidade.

Elizondo Carmona, C. (2024). *Neurodiversidad. El funcionamiento del cerebro en la escuela inclusiva*. Octaedro.

Grandin, T., & Panek, R. (2018). *El cerebro autista*. RBA.

Paula Pérez, I. (2000). *Habilidades sociales: educar hacia la autorregulación. Conceptualización, evaluación e intervención*. Horsori.

Paula Pérez, I., & Torrents, J. (2010). *El niño con autismo. Otra manera de estar en el mundo. Historias de vida reales*. Milenio.

10.4. Deseño Universal para a Aprendizaxe.

CAST. (2024). *Pautas para el Diseño Universal para el Aprendizaje (DUA) 3.0*.

10.5. Referencias normativas.

- Constitución Española de 1978.
- Convención sobre os Dereitos do Neno (Nacións Unidas, 1989).
- Convención sobre os Dereitos das Persoas con Discapacidade (Nacións Unidas, 2006).
- Lei Orgánica 2/2006, do 3 de maio, de Educación, modificada pola Lei Orgánica 3/2020, do 29 de decembro (LOMLOE).
- Decreto 229/2011, do 7 de decembro, polo que se regula a atención á diversidade do alumnado dos centros docentes da Comunidade Autónoma de Galicia nos que se imparten as ensinanzas establecidas na Lei orgánica 2/2006, do 3 de maio, de educación.
- Orde do 8 de setembro de 2021 pola que se desenvolve o Decreto 229/2011, do 7 de decembro, polo que se regula a atención á diversidade do alumnado dos centros docentes da Comunidade Autónoma de Galicia en que se imparten as ensinanzas establecidas na Lei orgánica 2/2006, do 3 de maio, de educación.

10.6. Formación permanente do profesorado.

O Equipo FARO promoverá a actualización continua dos coñecementos do profesorado mediante a consulta de publicacións científicas, documentos técnicos e materiais elaborados por universidades, administracións educativas e institucións especializadas en inclusión, autorregulación, neurodesenvolvemento, accesibilidade e benestar emocional.

A presente bibliografía poderá revisarse periodicamente para incorporar novas evidencias científicas e publicacións de referencia que contribúan á mellora continua do Proxecto FARO.

